

Kusudi Kuu Kabisa

Bali tukienenda nuruni, kama yeye alivyo katika nuru, twashirikiana sisi kwa sisi, na damu yake Yesu, Mwana wake, yatusafisha dhambi yote—1 Yohana 1:7.

Umoja ni nguvu na Bwana anataka kwamba ukweli huu upate kufunuliwa kwa washiriki wote wa mwili wa Kristo. Wote wanapaswa kuwa wamoja katika upendo, upole na katika unyenyekevu wa akili. Wakiwa wameunganishwa katika jamii ya waumini kwa ajili ya kusudi la kuunganisha na kueneza mvuto wao, wanalazimika kufanya kazi kama Yesu alivyofanya. Wanapaswa daima kuonesha uungwana na heshima kwa kila mmoja. Kila talanta ina mahali pake na inapaswa kusalimishwa chini ya utawala wa Roho Mtakatifu.

Kanisa ni jamii ya Kikristo iliyoundwa kwa ajili ya washiriki wanaoliunda, ili kwamba kila mshiriki aweze kufurahia msaada wa neema na talanta zote za washiriki wengine na utendaji wa Mungu juu yao, kulingana na karama na vipawa vyao kadhaa. Kanisa linaunganishwa katika vifungo vitakatifu vya ushirikiano ili kwamba kila mshiriki aweze kufaidika kwa mvuto wa mwingine. Wote wanapaswa kujifungamanisha kwenye agano la upendo na mapatano. Kanuni za Kikristo na neema ya jamii yote ya waumini wanapaswa kukusanya nguvu na uwezo katika uwiano wa kazi. Kila muumini anapaswa kufaidika na kuimarishwa na mvuto uadilishao na ubadilishao wa vipawa tofauti vya washiriki wengine, ili kwamba yale yanayokosekana kwa mmoja yaweze kufunuliwa kwa upana kupitia kwa mwingine. Washiriki wote wanapaswa kuwa na umoja, ili kanisa liweze kuwa tamasha kwa ulimwengu, kwa malaika, na kwa wanadamu.

Agano la makubaliano katika ushirika wa kanisa ni ili kila mshiriki atembeke katika nyayo za Yesu, ili wote wajitie nira Yake na wajifunze Kwake Yeye aliye mpole na mnyenyekevu wa moyo. Wakifanya hivi, anasema Mwokozi mpendwa, “Mtapata raha nafsiini mwenu. kwa maana nira yangu ni laini, na mzigo wangu ni mwepesi” (*Mathayo 11:29, 30*).

Wale waliojitia nira ya Yesu watavuta pamoja. Watakuza huruma na ustahimilivu na katika uigaji Mtakatifu watajitahidi kuwaonesha wengine wingi wa huruma na upendo ambao wao wenyewe wanauhitiwa mno. Yeye ambaye ni dhaifu na asiye na uzoefu, ijapokuwa ni dhaifu, anaweza kuimarishwa na tumaini zaidi na wale walio na uzoefu mkubwa. Ajapokuwa mdogo kuliko wote, bado yeye ni jiwe ambalo lazima ling’ae jengoni. Yeye ni mshiriki wa muhimu mno katika mwili uliunganishwa, ameunganishwa kwa Yesu kiongozi aliye hai na kupitia kwa Kristo anatambuliwa pamoja na ukamilifu wote wa tabia ya Yesu kiasi kwamba Mwokozi haoni haya kumwita ndugu yake.... Kanisa, lililojitenga na kuwa tofauti na ulimwengu, katika tathmini ya mbinguni linahesabiwa kuwa kitu kikuu kuliko vyote duniani.... Kanisa linapaswa kuwa kama vile Mungu alivyokuwa amepanga liwe, kiwakilishi cha familia ya Mungu katika ulimwengu mwingine (**Selected Messages 3:15-17**).